

Kontuola

ANTZUOLA / Egubakoitza / 2004eko ekainaren 11a / 205. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Denondako Kirol Jaia ospatuko dute bihar, Mankomunitateak antolatuta

AINTZANE IRIZAR

Bihar, zapatua, Debagoieneko Mankomunitateak antolatuta, XII. Denondako Kirol Jaia ospatuko dute. Urtero ibarreko herri ezberdin batek hartzen du topaketa hori antolatzeko ardura, eta aurten, Antzuolari egokitu zaio. Udal Pilotalekuan izango da, 10:30ean hasita.

Ibarreko herri guztietatik etorriko dira biharko kirol jaira; guztira, Debagoieneko 60 bat ezindu fisikok eta psikikok hartuko dute parte.

Udal Pilotalekuan izango dira ekitaldiak, 10:30ean hasi eta 13:00ak arte. Boccia, eslaloma, goal-balla, badmintona, saskibaloia eta aerobika izango dira parte-hartzaileek egingo dituzten kirolak batzuk. Batzuk ohiko kirolak dira; beste batzuk, berriz, ezinduei egokitutakoak.

Eguerdi aldera, bestalde, luntxa izango dute parte-hartzaileek eta euren senitartekoek.

Ibarreko Udaletako kirol teknikariak ibiliko dira antolakuntza lanetan, baita hainbat begirale ere.

Mankomunitateak jarriko dizkie autobusak parte-hartzaileei



DEBAGOIENOKO MANKOMUNITATEA

Iaz Oñatin egin zuten ezinduendako kirol jaia.

Antzuolara etorri ahal izateko, eta doan izango da zerbitzua.


HELBURUA, ELKAR EZAGUTZEA

Debagoieneko Mankomunitateak hiru kirol jai antolatzen ditu urtero garai honetan, eta halaxe egin

du aurten ere: gaur, egubakoitza, erretiratuendako jaia izango da Aretxabaletan; bihar, ezinduena Antzuolan eta aurreko zapatuan, berriz, umeena egin zuten Oñatin.

Kirol jai horien helburua da Debagoieneko herrietako jen-

deak elkar ezagutzea eta harremanak egitea; azken baten, ibararren batasuna bultzatu nahi du Mankomunitateak, kirolaren bitartez. Bide batez, ondo pasatzeko aitzakia ederra ere bada zapatuko jaia.



GOITBkoak frogak egiten

Antzuolan Goiena Telebista jartzeko hainbat froga egiten jardun dute oraingo astean. Altzeta baserriaren ondoan Eusko Jaurlaritzak duen antena-gunean antena berria jarri dute teknikariek; GOITBren seinaleak gainerako kateen seinaleei kalterik egingo ez diela ikusteko eta herrian seinalea ondo hartzen dela ikusteko egin dituzte frogak horiek. Froga horiek bukatu eta beharrezko tramiteak egin ondoren, GOITB ikusteko moduan egingo gara antzuolarrok. /A.I.

LABUR

Erretiratuek irteera egingo dute Gernikara

Ekainaren 21ean, astelehena, Gernikara joango dira erretiratuak. Junta Etxea bisitatuko dute han eta Lekeition bazkalduko dute. Ondarroara ere joango dira. Ekainaren 15ean, 16an eta 17an egongo da izena emateko aukera, 18:00etatik 19:00etara. 24 euro kostako da.

Gimnasia erritmiko erakustaldia, eguaztenean

Datorren asteko eguaztenean, hilak 16, gimnasia erritmikoko herriko neskek erakustaldia egingo dute Udal Pilotalekuan. Bergarako Ariznoa taldean dihardute gehienek, eta orain dela gutxi urrezko eta zilarrezko dominak irabazi dituzte Gipuzkoako eta Euskadiko txapelketetan.

Udaletxeak udako ordutegia dauka irailera arte

Aurreko astean hasi ziren udaletxeko langileak udako ordutegiarekin. Goizez bakarrik zabalduko dute, 08:00etatik 14:00etara, hain zuzen ere. Irailera arte izango du ordutegi hori. Liburutegiak ez du oraindik aldatuko; ekain amaierara arte ohiko ordutegiarekin jarraituko du.

Kadete mailako pilotariak ibarreko txapeldun

Aitor Mendizabal, Aitor Jauregi eta Asier Longares Olalde elkarteko pilotariak Debarroko pilota txapelketako finalerdietarako sailkatu dira. Oraindik ez dute zehaztu noiz eta non jokatuko dituzten finalerdietako partiduak. Lehenengo fasean, Debagoieneko txapelketan, lehenengo postuan geratu dira, kadeteen mailan.

ELKARRIZKETA

LURDES ALBERDI/UDAL LIBURUTEGIKO ARDURADUNA

“Urtetik urtera ipuin hobeak aurkezten dituzte sariketa honetan”

A.I.

Urtero moduan, Patxiko Txerren ipuin sariketa antolatu dute Udal Liburutegiak eta Herri Ikastetxeak. Beste urtetan San Isidro egunean egin izan dute sari banaketa; aurten, berriz, hilaren 17an banatuko dituzte sariak.

Patxiko Txerren ipuin sariketa antolatu duzue zazpigarren aldiz. Zein da sariketa horren helburua?

Helburua da neska-mutikoen artean irakurtzeko eta idazteko zaletasuna bultzatzea. Esan bezala, zazpigarren urtea da sariketa hau antolatzen duguna, eta egia esan, urtetik urtera, ipuinen kalitatea gora doa; geroago eta ipuin hobeak aurkezten dituzte umeek. **Zeini zuzenduta dago?**

Herri Ikastetxeko ikasleei, Lehen Hezkuntzako neska-mutikoei, hain zuzen ere. Gainera, ikastetxeko arduradunekin elkarlanean antolatzen dugu sariketa. **Saritutako ipuinak liburuxka baten jasotzen dituzue, ezta?**

Bai; orain dela bi urte hasi ginen horretan. Aurten, gainera, osatzen dugun liburuxkaren ale bana emango diegu ikastetxeko ume guztiei, eta liburutegian ere hainbat ale jarriko ditugu. Gainera, parte hartzen duten ipuin guztiak koaderno baten jasotzen ditugu; koaderno horiek liburutegian eta eskolan egoten dira. **Sariketa honen izena, Patxiko Txerren, nondik dator?**

Patxiko Txerren eleberri baten izenburua da. Antero Apolazak idatzi zuen liburu hori; herriko botikaria izan zen Antero. Urretxuarra zen arren, ama antzuolarra zuen eta Antzuolan bertan hil zen, 1908. urtean. Lehenengo aldiz, 1890. urtean argitaratu zuen eleberria, eta harrezkero, bost edizio izan ditu.

Antzuolan kokatuta dago, gainera, ipuin hori: Basalde auzoko familia baten gorabeherak kon-



A.I.

“Saritutako ipuin guztiak liburuxka baten jasoko ditugu, eta ikasle guztiei emango diegu”

tatzen ditu, eta herriko hainbat toki aipatzen ditu. Liburutegian badugu liburu hori, irakurri nahi duenarendako.

Noiz egingo duzue sari banaketa ekitaldia?

Datorren asteko egunean izango da, goizez, Herri Ikaste-

“Datorren asteko egunean, hilak 17, egingo dugu sari banaketa ekitaldia eskolan”

txean. Lehenengo, antzerki emanaldia egingo dute ikasleek, eta ondoren, sariak banatuko ditugu. Irabazleek liburu sorta bat jasoko dute; gainerako guztiei, berriz, lehen esan dugun moduan, saritutako ipuinekin osatutako liburuxka bana emango diegu.

JAIAK

Ondarreko jaiak oraingo asteburuan

AINTZANE IRIZAR

Hamar urteko geldialdiaren ondoren, iaz berriro antolatu zituzten jaiak Ondarreko bizilagunek. Aurten ere antolatu dituzte Gorpuzti jaiak auzo horretan. Umeendako jolasak, afaria, erromeria, prozesioa..., ekitaldi ugari egongo da bihar, zapatua, hasita.

Bihar, zapatua, hasiko dituzte Gorpuzti jaiak Ondarre auzoan. Eguerdian, 12:00etan, ginkana jokoak egongo dira, Aiastui Peñak antolatuta.

Arratsaldean ere jolaserako aukera paregabea izango dute herriko umeek; 16:00etan umeendako hainbat jolas egongo dira, eta 18:00etan umeendako krossa.

Iluntzean, berriz, 20:30 aldera, auzotarrek afaria egingo dute Ondarreko plazan bertan. Ondoren, erromeria egongo da, eta bertaratzen direnei kafea banatuko diete antolatzaileek.

Domekan, berriz, 10:00etan hasiko dituzte ekitaldiak; etxakoak jaurtiko dituzte ordu horretan. 10:30ean, diana izango dugu herriko txistulariekin.

12:30ean izango da eguneko ekitaldi nagusia, prozesioa, hain zuzen ere. Aurten jaunartzea egin duten neska-mutikoei, apaizarekin batera, prozesioa egingo denean, parrokiatik Ondarrera; hantxe, Ondarreko plazan, ototzaldi bat egingo dute. Ondoren, 13:00etan, dantzari txikien saioa izango dugu. Dantza saioa amaitzen denean, berriz, salda banatuko dute herritarren artean. 13:30ean bukatuko dituzte aurtengo jaietako ekitaldiak; zozketa egingo dute orduantxe.

SAN JUAN ETA SAN PEDRO JAIAK

Datozen asteburuotan hainbat jai izango ditugu herrian. Alde batetik, ekainaren 23an, San Juan bezperan, hainbat ekitaldi egongo da herriko plazan: arbola jasotzea, dantza saioa, lore lehiaketako sari banaketa... Eta, aurten, gainera, San Juan sua ere egingo dute plazan. Uzarragan ekainaren 27an ospatuko dute aurten San Juan eguna. Kalebarrenen, ekainaren 26an eta 27an ospatuko dituzte San Pedro jaiak; San Martzial jaiak, azkenik, uztailearen 3an eta 4an.



ARIXBOA

Domekan, Gorpuzti eguneko prozesioa egingo dute, meza nagusiaren ondoren.

SUKALDEKO ALTZARIAK
Harizki

MUEBLES
IGEA

Sukalderako eta bainurako altzariak
Altzari rustikoetan
espezializatuak

zabalo
IGELTSEROTZA

Jose Luis Zabalo

Kalegoi 9, 1. solairua
ANTZUOLA.
Tel. 943 76 60 89
Faxa: 943 76 60 14

ZAHAR BERRITZEAK:
Fatxadak
Bainugela eta sukaldea
Lokal komertzialak
Teilatuak

**Eta orain....
GREMIOEN
KOORDINAZIOA**